

四庫全書

子部

欽定四庫全書

子部

冊府元龜卷一百六十七至九

詳校官中書臣涂日煥

員外郎臣牛勳文覆勘

總校官庶吉士臣何思鈞

校對官中書臣宋枋遠

謄錄監生臣潘坦

欽定四庫全書

冊府元龜卷一百六十七 宋 王欽若等 撰

帝王部

招懷第五

周太祖以漢乾祐中奉命討河中李守貞太祖令水軍  
沿河且戰棹長連城用步軍分守各以使臣監之賊小  
校劉重進高思來降補招收十將付以錦袍銀帶積於  
城下令誘賊軍

廣順元年正月徐州押牙鞏廷美教練使楊溫據城拒守勅曰朕昨迫于軍情遂臨帝位已曾示諭想備聞知汝等初得耗音爭無疑懼一則顧身掇甲閉關須至如是今覽汝等報姚武文字備悉心誠况汝等始則為使主竭忠終則向朝廷順命秉持甚善節義可嘉佇俟旌褒何煩憂懼近者已有勅旨汝等竝授郡符只候新節度使入州即便施行恩命朕當示信于天下汝宜諭旨於城中凡在軍民各宜安堵其諸元從職員並宜安撫

三月丙寅與荆南高保融詔曰安審琦奏湖南船網

缺

行監押節級官健四百九人在襄州朕以武陵長沙尋  
戈結釁既道塗而梗澁致官健以淹留卿義在卹鄰志  
惟體國俾歸途而無滯副軫念以在茲已降宣命下襄  
州取逐人便穩如願歸本道者即差人管押至荆南候  
到卿可差人部送至湖南

五月丁丑勅京兆鳳翔府朕臨御以來憂勤無怠慮庶  
政之尚闕恐蒸民之未安寢食不遑夙宵若厲早歲雍

歧連叛兵草薦興迨至討平可知傷弊誠念負罪之黨  
尋以誅夷亡命之徒近皆滌蕩則被釋放者皆為赤子  
經釐草者悉是平人雖性命之永全在生涯之何着與  
言軫閔未嘗去懷其京兆鳳翔府先因攻討之時及收  
復之後應有諸色犯罪人第宅莊園店舍水磴曾經籍  
沒及本主未歸者已宣下本道却給付罪人骨肉為主  
仍仰逐處嚴切指揮勿令所繇裏私闌差邀求資金庶  
令存濟用副朕懷

八月滄州王景言幽州饑繼有流民入界勅朕以沿邊百姓適因災沴遂至流亡拋棄鄉園扶攜老幼未有安泊之地深懷愍念之心宜切撫綏庶令存濟其邊界流移人戶差使臣與所在官吏撫恤安泊其滄景德管內甚有河淤退灘之土蒿萊無主之田頗是膏腴少人耕種可令新來百姓量力佃蒔只不得虛占土田有妨別戶居止如是願在別管界內居住者亦聽取便所在關津口岸不得阻滯如邊界有親識可依亦聽從便仍人

給斗粟委三司支給候安泊定取便耕種放差稅

是月晉州送擒獲太原軍士二十六人各與巾履衫袴  
竝釋之

二年正月賜兗州慕容彥超詔曰朕與卿久叙兄弟比  
無嫌隙自前歲奔逃之後尋時慰納如初察憂疑則推  
以赤心邀信誓則指之白日留男不歸大職欲已只在  
舊藩動必依從斷無疑阻何故執心不定率意而行聚  
草寇于城中修戰具于衙內發言不遜舉事無常差遣



元隨主持鎮務恣令殘害任便誅求率配之名三四十  
件捨捨事力贍養姦寇一境生靈不勝其苦南則結連  
淮寇北則勾喚劉崇早者差都押牙鄭麟口奏敷陳乞  
移藩閩朕推心嘉納回詔允俞昨上表請赴闕廷朕亦  
一從卿意復成欺侮翻有指名兼更偽詐鄆州書題點  
染齊王勲德且非竒計何必如斯近者東面諸侯相繼  
奏報稱卿差點管內人戶團併義營欲議發軍攻取隣  
道衆情不服闔境波逃其百姓皆併力同心殺却元隨

鎮將例各將家迴避散投外界潛藏或則保聚山林就  
便構置寨柵懼卿挾讐屠害不保朝昏懸望官軍救護  
為主朕為人父母能不痛心弔伐之行蓋不獲已今差  
侍衛步軍都指揮使曹英等部領馬步大軍問卿情狀  
卿若能改心知過束身歸朝當許全生待之如舊朕或  
違信是謂自欺卿若拒張便令攻取今更飛此詔始末  
指陳冀卿靜慮深思庶幾轉禍為福言盡於此卿其圖  
之

二月癸卯以先擒獲太原鄉軍頭周暉而下百三十三人各賜錢鞋遣供奉官蓋繼明部送昭義界放還鄉里甲辰以先獲淮南指揮使燕敬權都頭趙筠官健吳進羅義等四人放歸本土仍賜衣服金帛以遣召見謂之曰爾歸言達吾意於爾君凡人惡克邪獎忠順天下一也我之賊臣撓亂國法嬰城作逆殃及生靈不意吳人助此克慝驅徒領衆涉我封陞南土君臣非良莠也是月戊申以兗州兵士數百人先在金州屯戍其家口

仍在本城中勅就金州撫諭之曰一昨慕容彥超結連  
草寇毒寇蒸民側近縣鎮鄉村無名脅從徒害人神憤  
怒須議討除朝廷已發大軍往彼攻取汝等屯戍邊境  
勞苦經時言念忠勤不怠寤寐所有汝等家口並在充  
州城內屬此背違想皆憂念在朕誠意暫不弭忘已降  
宣命指揮曹英候收復城池日晝時選得力負寨部領  
兵士率先入城占據本營安撫逐人骨肉家口不得輒  
有驚恐

五月親征兗州乙丑旦次金鄉曹英送賊黨文懷美三人至行在賜袍帶釋之癸酉賊散員都將周延嗣歸順自是賊黨相繼來奔皆有所賜

是月兗州行軍孫暉副使劉演及本城將校等為軍士所獲帝以其脅從皆賜衣裝以釋之諸村鎮要路捕獲得賊黨者相繼而至帝多宥之彥超元隨都押衙鄭麟李玘及伶官十數人王峻請而免之

是月兗州平制曰應曾與慕容彥超同惡之人逃避潛

藏者竝與釋放仰於所在自出陳首百日不首者復罪如初應已伏誅逆黨人等於諸處有骨肉者先已指揮放罪招安尚慮本身抵法之後却有驚疑宜令所在州縣明行告諭竝釋放不問兗州城內幕職及縣官吏軍府將校竝令放罪及衙前州使兩院職役人本城軍都竝勒仍舊自慕容彥超違背已來鄉村山寨豪強人等接便為非劫掠虜殺今因收復之後竝與洗滌一切不

問

八月淮南界俘獲耕牛雜畜詔送還本處

三年正月夏州李彝殷府州折德宸上言河東界偽麟州刺史楊仲訓以蕃部攻圍繼來求便乞歸明賜勅書曰麟州刺史楊仲訓及軍州將吏職員等拒夏州節度使李彝殷奏得汝等狀稱劉崇拒命聖朝堅其逆壘今被部族侵迫乞垂解救兼已稱大朝正朔竝聞逆命邊郡無歸值妖孽之脅從致朝貢之阻絕今則蕃部兵民助我討違汝等哀告蕃鄰欲謀歸向備覩變通之意特

用弘納之仁宜示撫安用獎忠順已指揮州府及諸蕃部不令進攻汝等便宜明宣朝旨告諭軍民應是通河東道路口岸畫時遣人守禦不得通人來往凡有公事一一奏取朝廷指揮其官員將校職掌一切依舊仍分析名銜申奏當議等第加恩兼之酬賞邠州折從阮言奉詔示諭慶州諸蕃部尋遣人告報首領其野鷄第七門族首領李萬全及樹夥等族受勅書領袍帶等設誓其諸族猶負倔彊見與寧州諸軍襲擊其次月戊申邠



州折從阮言奉詔討逐慶州野鷄族兼招攜諸部族臣  
自前月興兵後招到樹夥等二十一族與勅書袍帶綵  
緞設酒食令發誓詞盟約兼排列軍士圍繞今已和斷  
兼補郝爽為慶州牢城使又發龍捷一指揮赴寧州深  
州言蕃界內來歸老小漸多任便諸處安置二月已前  
解州刺史鄭元昭為慶州刺史充青白兩池推鹽制置  
使廣順初以郭彥欽再刺慶州性瀆貨及擅加推錢民  
夷流怨州北十五里寡婦山有蕃部曰野鷄族多羊馬

彥欽作法擾之利其賂遺蕃情獷悍易為不法彥欽乃  
奏野鷄族暴盜掠奪綱商帝難於興師遣使賫詔書撫  
慰望其率化蕃人既苦彥欽惡政不時報命或曰野鷄  
部族蕃落之最狡者宜以兵詰而誅之乃移陝帥折從  
阮鎮邠州又令寧州張建武會合環州皇甫進兵攻之  
建武勇於立功徑趨野鷄族帳追擊殺數百人其喜萬  
玉族折思族殺牛族者皆熟戶蕃人此無猜忌又殺牛  
素與野鷄族有憾且聞官軍討伐相聚餉饋欣然欽奉

官軍利其財貨孳畜劫奪之翻為諸族所誘至包山負險之地官軍不利被蕃人迫逐投崖墜澗而死者數百餘折從儉等以兵自保無相救應建武陷長男餘衆僅免帝怒彥欽及建武俱罷任彥欽至京師勒歸私第竟不得見建武左遷率府卒是月元昭兩地推鹽之任故特行制置以寧邊人

其月契丹降人偽授儒州晉山簿李著鄭縣簿王裔秦州司法劉裴等著賜比明經出身裔裴比學究出身

五月沁州和州縣民百四戶來奔遣於河中安置命節度使彥超分配居止撫安

六月勅大原來降嵐州錄事叅軍丁守加朝散大夫試大理評事兼監察御史為蔡州真陽令

世宗顯德元年正月詔自廣順元年後來幽州淮南西川河東等界軍人百姓投降者累令安撫所在有無荒閒田土一任請射住佃為永業西川接界久不通商今後一任來往只須所屬官吏防閑恐夾帶奸細

三月辛巳詔應沁邊州府接近西州淮南契丹河東界處仰所在府州及巡檢使臣鈐轄兵士及邊上人戶不得侵擾外界及虜人畜務要靜守疆場勿令搔動其投來人戶仍仰倍加安撫

是月親征河東甲午次高平縣兵士解嚴詔河東降卒二千餘人各賜絹二疋竝給衣裳義軍各絹一疋令還本部受賜者無不歡呼感泣

四月戊午偽遼州刺史張漢超待罪於行闕命釋之仍

賜衣服鞍馬器備等甲子偽州防禦使董希顏偽嵐州  
刺史郭言等詣行闕見帝命釋罪賜賚有差丙寅偽沁  
州刺史李廷誨見丁卯偽憲州刺史韓光愿見皆賜賚  
有差癸酉忻州偽監軍李就殺偽刺史趙臯及契丹大  
將楊耨姑來降尋以李就為檢校司空忻州刺史仍遣  
使慰諭

是月討太原回詔河東及契丹敗散軍士其中有潛竄  
山谷間者竝令招喚不得輒有傷害如是義軍百姓便

可放還本家若是軍人及諸色人竝監送至駕前各與  
穩便安排遼沁二州新屬路府久陷賊境深可憫傷委  
本道節度使倍加安撫所有劉崇煩苛事件竝與除放  
二年九月甲午昭義節度使李筠遣牙將押送先擒到  
河東偽兵馬監押程友已下二百餘人到闕帝皆赦之  
仍加賜賚

是月西南面招討使王景獲西川軍校姜暉已下三百  
餘人來獻帝曰姜暉等悉是中朝將士昨拒王師盡力

於僞主亦其忠也宜竝赦之仍以錢帛賜之

閏九月潁州主言有淮南百姓邢盛等二人度淮而來  
言因失耕牛故來此尋覓本部以來自賊境奏稟朝旨  
帝曰率土之內皆吾民也豈以不庭之境便為限隔宜  
速放還仍給官錢市牛與之

十一月以秦鳳平詔秦城階等州歸明將士自長行已  
上等第支賜優給其官吏將校職員等竝與加恩其中  
有西川人員除恩澤賞賜外如願駐留者厚與請受如



願歸去者竝給盤纏用慰衆情免違物性應捉到賊軍  
將校一切放罪竝令押送赴闕各與恩澤自何里建等  
歸投西川已來訪聞管内州縣連歲飢荒百姓軍人倍  
多勞役科斂頻併法令滋章既為吾民宜革前弊今後  
除秋夏兩稅征科外應偽屬所立諸般科率名目及非  
理徭役一切停罷德音未該者宜令所司相次指揮  
十二月辛卯右領衛將軍王繼清押偽鳳州節度使王  
環已下四十三人到闕帝赦其罪須賜有差先是自興

師西伐至收復秦鳳前後擒獲川軍凡數千人帝皆赦之仍給以袍袴糗糧署為懷恩指揮繇是降卒無不感悅尋以環為左驍衛大將軍仍以服玩鞍馬賜之

三年正月親征淮南壬子次永寧鎮帝謂侍臣曰壽州圍閉數月大軍暫退淮上如聞四面百姓往日入城迴避者多來歸業今王師再舉慮其復入城中枉為餓殍宜先告諭俾安其家乙卯次趙村軍士於戍邏間擒到敗卒數人帝問曰爾敗來數日何不走入壽州而乃日

夜奔走周旋不離此地盖心迷耳命釋其縛仍以袍袴  
賜之

二月丁亥偽左神衛軍使徐象等一十八人來降賜錦  
袍銀帶鞍馬繒帛有差

三月偽命光州都監張承翰以城歸順授承翰集州刺  
史

是月賜揚光二州先歸順員流張洪等三十五人錦袍  
銀帶

戊戌壽州城內天成軍使蔡暉來降賜錦袍銀帶錢絹等

壬戌壽州城內軍校陳元貞等一十三人及水砦副將李溫等來降賜物有差

是月命供奉官安洪道押江南進奉副使王崇質李德明等二人發赴金陵初吳人聞正陽之敗其氣已消矣又聞今上敗何延錫於渦口擒皇甫暉於滁州始懼覆亡之不暇乃遣鍾謨等奉表來上謨等因面奏云臣大

國主願割壽濠泗楚光海六州之地隸於大朝仍歲貢  
百萬之數以助軍用請罷攻討及孫晟至所奏亦然上  
以淮南諸郡半為我有復又諸將捷奏日聞於行在料  
其事勢可以盡取江北之地乃不許之德明等上見急  
攻壽陽慮頃刻不保乃奏云臣之保本國向來不知大  
朝兵力如是願陛下寬臣等五日之誅容臣自往江南  
取本國章表割江北諸郡盡獻于大朝上乃許其行因  
令賫璽書以賜李景書曰頃自有唐失御天步方艱巢

蔡喪亂之餘朱李戰爭之後中夏多故六紀于茲海縣  
瓜分英豪鼎峙自為聲教各擅蒸黎連衡而交結四夷  
乘釁而憑陵上國華風不競否運所鍾凡百有心孰不  
興憤朕猥承先訓恭荷永圖德不迨於前王道未方於  
往古然而擅一百州之富庶握三十萬之甲兵農戰交  
修士卒樂甲思欲報累朝之宿怨刷萬姓之包羞是以  
踐位以來懷安不暇破幽并之巨寇收秦鳳之全封兵  
不告疲民有餘力一昨廻軍隴上問罪江干我實有辭

咎將安執朕親提金鼓尋渡淮淝上順天心下符人欲  
前鋒所向彼寇無遺棄甲僵屍動盈川谷收城徇地已  
過淝陽豈有落其爪牙折其羽翼潰其心腹扼其吭喉  
而能不亡者哉早者泗州主將遞送到書一函尋又使  
人鍾謨李德明至賫所上表及貢奉衣服腰帶金銀器  
帛茶藥牛酒等近差健步進到第二表今月十六日使  
人孫晟等至齋到第三表及進奉金銀等到行朝深誠  
厚意觀其降身聽命引咎告窮所謂君子見幾不俟終

日苟非達識孰能若斯但以奮武興戎所以討不服悖  
信明義所以來遠人五帝三王盛德大業嘗用此道以  
正萬邦朕今躬統戎師龔行討伐告于郊廟社稷詢于  
將相公卿天誘其衷國無異論苟不能恢復外地自畫  
邊疆便議班師真同戲劇則何以光祖宗之烈厭士庶  
之心匪徒違天蕪且拂衆但以淮南部內已定六州廬  
壽濠黃大軍悉集指期尅日拉朽焚枯其餘數城非足  
介意必若盡淮甸之土地為大國之提封猶是遠圖豈



同迷復如此則江南吏卒悉遣放還江北軍民竝當留  
住免違物類之性俾安鄉土之情至於削去尊稱願輸  
臣禮非為故事實有前規蕭譽奉周不失附庸之道孫  
權事魏自同藩國之儀古也雖然今則不取但存帝號  
何爽歲寒倘堅事大之心終不迫人于險事實真慙詞  
匪枝游俟諸郡之悉來即大軍之立罷質于天地信若  
丹青我無彼欺爾無我詐言盡于此皆不須云苟曰未  
然請從茲絕竊以陽春在候庶務縈思願無廢於節宣

更自期於愛重音塵匪遠風壤猶殊翹想所深勞於夢寐又賜其將佐書曰朕自類禡興師麾旄問罪絕長淮而電擊指建業以鷹揚旦夕之間克捷相繼至若兵興之所自釁起之所來勝負之端倪戎甲之次第不勞盡諭必想具知近者金陵使人繼來行闕追悔前事委質大朝非無謝咎之辭亦有罪軍之請但以南邦之土地本中夏之封疆苟失克復之期大孤朝野之望已興是役固不徒還必若自淮以南畫江為界盡歸中國猶是

遠圖所云願為外臣乞比湖浙彼既服義朕豈忍人必當別議封崇待以殊禮凡爾將佐各盡乃心善為國家之謀勉擇常久之利

四月駐蹕于壽春城下以江南偽命常州刺史姚鳳為左屯衛將軍是月前湖南節度使馬希崇昆仲凡十有七人自揚州來見賜衣物鞍馬錢帛各有差賜以希崇為左羽林統軍又以淮南偽命揚州通句尚書虞部員外郎何幼冲為工部郎中仍賜金紫

五月以偽命東都副留守工部侍郎馮延魯為太府卿  
六月詔以江北諸州縣有未收復處宜令行營大將明  
申招諭儻能知機歸順朝廷其向來名位當一切如故  
仍宣名藩大郡厚加旌賞其軍都自長行已上竝與優  
給其中願歸江南者亦聽自便

四年正月詔曰應淮南界南百姓宜令行營將校告報  
諸軍不得俘虜傷害

三月親征淮南壬寅賜收降到淮南將卒許文鎮已下

一萬五百二十四人分物有差

甲辰偽壽州節度使劉仁贍上表乞降丁未再差人上表是日賜仁贍詔曰朕昨者再幸淮淝盡平諸砦念一城之生靈久困重圍豁三面之疎網少寬疲瘵果聞感義累貢來章卿受任江南鎮茲准旬踰年固守誠節不虧近代封疆之臣卿且無愧忠烈廻翔之際不失事機萬民獲保於安全一境便期於舒泰卿便可宣達恩信慰撫軍城將覲儀刑良增欣沃覽奏嘉獎再三在懷差

東上閣門使張保績入城宣諭是日仁贍遣其子崇讓  
上表請罪又賜詔曰朕臨御萬邦推誠克已當五兵未  
戢雷霆宣震耀之功暨萬旅投戈覆戴示生成之德况  
卿等受任本國保茲列藩戮力邦家將帥常道救援不  
及迴翔得宜事主盡心何罪之有已令宣諭當體優恩  
勉自保調無更疑慮稱獎在念寤思不忘戊申帝率六  
師於壽州城北受仁贍以下降將仁贍已抱疾帝令不  
拜慰勞久之仍賜蟒衣玉帶御馬鞍轡金銀器皿錦綺

綾羅等甚厚又賜其子崇讓等四人及監軍使周廷構節度判官鄭牧營田副使孫羽等分物又賜其軍士錢絹米麥各有差尋除仁贍天平軍節度使特進檢校太尉兼中書令

壬子以江南偽命西北面行營監軍使舒州團練使朱元為蔡州防禦使文德殿使監軍使周廷構為衛尉卿壽州營田副使孫羽為太僕卿節度判官鄭牧為鴻臚卿賞歸順也

四月辛未以江南偽命西北面行營應援使前永安軍節度使檢校太尉許文績為檢校太尉左監門行上將軍以偽命會西北面行營應援都軍使前武安軍節度使檢校太傅邊鎬為檢校太傅左千牛衛上將軍仍各僉一子為供奉官

五月賜許文績邊鎬王環周廷構馮延魯鄭牧孫羽等宅地各數畝又以材植緡錢等賜之俾構居第

八月又賜許文績等各絹三百疋綿五百兩俾備時服



十一月癸亥賜濠州降卒錢帛各有差

乙丑漣水縣偽雄武軍使知縣事崔萬迪以其縣來降  
尋授萬迪瓊州刺史充開封府馬步軍都指揮使仍以  
鞍馬金銀錢帛等物賜之

丙寅制以偽濠州團練使郭廷謂為亳州防禦使以偽  
濠州兵馬都監泰州團練使陳遷為忻州團練使以偽  
保義軍節度使陳承昭為右監門衛上將軍仍以錦袍  
金帶賜之

是日賜漣水縣歸降兵士衣物錢帛各有差

庚午偽濠州團練使郭廷謂已下詣行宮見帝優以待之咸厚加賜賚焉

十二月泗州守將范再遇以其城降尋授再遇檢校太保宿州團練使賜推誠化功臣仍厚賜加賚

五年五月甲寅韓令坤自揚州差人執江南偽閣門承旨李延祚來獻延祚稱奉李景命起遣江北人戶過江帝命釋之乃以錦袍賜焉

是月又賜海州捷到軍校卒伍錢帛有差

二月征淮南幸揚州辛酉偽天長軍使兼雄州刺史易贇及監軍使周暉已下詣行宮見尋以贇為天雄軍節度行軍司馬以暉為萊州團練副使咸加賜賚焉

三月己亥賜江南書云皇帝恭問江南國主劉承遇至齋到草表分割廬舒蘄黃等州畫江為界兼重叠見謝者頃逢多事莫通玉帛之歡適自近年遂構干戈之役兩地之交兵未息蒸民之受弊斯多一昨再辱使人重

尋前意將數久要須盡縷陳今者承遇爰來封函復至  
請割州郡仍定封疆猥形信誓之詞備認始終之意既  
能如是又復何求邊陲頓靜於烟塵師旅便還於京闕  
永言欣慰深切誠懷其常潤一路及沿江兵棹今已指  
揮抽退兼兩浙荆南水路將士各降詔示竝令罷兵其  
廬黃蘄三路將士亦遣抽拔近外若彼中起揭逐處將  
員兵士及軍都家口了畢只請差人勾喚在彼將校交  
割州城所有江內舟船或慮上下須有往來已指揮只

令就北岸牽駕盡合披陳幸惟體認

是月命鹽城監使申屠諤齎璽書押御馬一十疋金銀鞍轡一十副散馬四十匹羊千口賜江南國主李景諤先為王師所擒帝釋而歸之因令齎是以往又命釋先擒到偽舒州刺史施仁望令歸江南仍加賜賚焉

四月江南進奉使馮延巳已下辭歸賜延巳金器百兩銀器五千兩絹五十疋錢五百萬緡馬四十蹄羊二百口及偽副給事中田霖已下所賜各有差

五月降璽書賜李景云皇帝恭問江南國主竊以道契  
昌隆撫有疆宇控朱方而定霸總澤國以稱雄五嶺三  
江風聲自遠重光奕世基構無窮不有竒傑之才孰副  
民庶之望朕猥以涼德奄宅中區接風壤以非遙幸馬  
牛之相及引領南望久渴徽猷果契素誠獲親高義一  
昨繼勞使介頻奉好音方在行朝未遑報命近還宮闕  
合遣輅車俛伸玉帛之歡少答歲寒之意今遣太府卿  
馮延魯衛尉卿鍾謨管押持送仍賜景御衣四對金玉

帶各一錦衣綺羅縠綾帛共十萬疋金器千兩銀器萬兩御馬五匹并金玉鞍馬散馬四百蹄羊五百口又賜其世子冀國信物稱是又賜絹十萬匹俾犒其師焉

六月辛未降璽書賜李景云朕居大寶之尊為萬邦之主體穹昊從人之意法禹湯罪已之心豁開襟懷昭示寰海方務協和之德豈忘曠蕩之恩載想融明諒應鑒認相次收到江南諸軍員寮兵士四千六百八十七人今竝放歸自是命使臣七人分番押送赴迎鑾渡過江

仍以資糧賜之南軍無不感悅

七月庚寅放江南天輝拔山長劍兵士七百餘人歸江南

十月甲午放刑部侍郎馮延魯左監門衛上將軍許文績右千牛衛上將軍邊鎬衛尉卿周廷構等竝放歸江南又勅淮南諸州舊隸江南者元置義軍宜竝放歸農十二月庚辰江南生辰國信使曹翰辭上令齎璽書以賜李景云皇帝致書恭問江南國主星聚湖關挺生英



哲命世既崇於基構承家撫有於江山顧寡昧之膺圖  
與君王之契協屬茲誕日遂舉舊章仍輟近臣往修國  
命導所懷於樂土期福履之無疆今差樞密承旨曹翰  
押生辰國信往彼到希見領仍賜景金銀器千兩錦綺  
緡帛二千疋御衣三襲玉帶二條名馬二十匹金銀鞍  
勒各一副

六年辛滄州四月壬辰至乾寧軍偽寧州刺史王洪率  
其部衆以城來降賜物有差尋授洪隨州刺史

五月幸瓦橋關以契丹偽州刺史高彥暉為華州刺史以偽鄭州刺史劉楚信為寧州刺史以偽關南巡檢使姚中斌為汝州刺史皆賞歸順之智也

六月戊寅賜偽泉州節度使劉從效詔曰黃禹錫至省所上表歸附大朝兼於京都置邸務事具悉卿自保全土宇專養黎元立功早達於機權臨事固無於凝滯乃能望中原而內附陳方略以輸誠永言恭勤良多嘉獎爰自江南通和之後朝廷禮遇方深用恩信以綏懷俾

寰區而是則兼以卿本道地隣江表嘗奉金陵遠有改  
圖理宜盡善如上都置邸與彼抗衡雖百谷朝宗無以  
異也是時從効遣牙將蔡仲興為商人間道至京師求  
置邸內屬

冊府元龜卷一百六十七

欽定四庫全書

冊府元龜卷一百六十八 宋 王欽若等 撰

帝王部

却貢獻

禹別九州以任土實周設九貢以致邦用量遠近之宜制輕重之法各以所有陳之藝極諸侯述職非為重幣也四海會同非實遠物也歸於宰旅賦之以時其或獻未有程人匪知禁或以竒而入貢或以貴而樂輸遠方

之珍不足以登俎豆非時之物不足以充庖厨徒罄下情靡資國用歷代王者知上之所好下有甚者故斥之而不御還之而不有書於簡冊垂為軌範茲亦有國之盛美也故錯綜其事於篇云

漢文帝時曾有獻千里馬者詔曰鸞旗在前屬車在後

鸞旗編以羽毛列繫幢旁載於車上大駕出陳於道而先行屬車相連屬而陳於後也 吉行五十

里朕乘千里馬獨先安之

安之言何所適往

於是還馬道里費

而下詔曰朕不受獻也其令四方毋求來獻

後漢光武建武十三年異國有獻名馬者日行千里又  
進寶劍價無百金詔以馬駕鼓車劍賜騎士

是年詔曰往年已勅郡國異味不得有所御獻今猶未

止非徒有豫養導擇之勞

豫養謂未至其時豫前養之導亦擇也

至乃煩

擾道上疲費過所其令太官勿復受

太官令一人秩六百石掌御膳飲食

明勅下以遠方口實所以薦宗廟自如舊制

口實膳羞之事也

章帝建初二年四月癸巳詔齊相省水紈方空穀吹綸

紈

紈素也水言色鮮潔如水穀紗也方如也紗薄如空也或曰空孔也即今之方目紗也齊有三服官故詔

齊相  
罷之

和帝時舊南海獻龍眼荔枝十里一置五里一堠

南海郡秦

置今廣州縣也廣雅曰益智龍眼也交州記曰龍眼樹高五六丈似荔枝而小廣州記曰子似荔枝而員七月熟荔枝樹高五六丈大如桂樹實如鷄子甘而多汁安石榴有甜醋者至日禺中翕然而赤即可食置為驛也

奔騰阻險死者繼路時臨武長縣汝南唐羗縣接南海

臨武縣屬桂陽即今廣州縣也乃上書陳狀元興元年帝下詔曰遠國

珍羞本以薦奉宗廟苟有傷害豈愛民之本其勅太官

勿復受珍繇是遂止焉

唐羗字伯游辟公府補臨武長縣接交州舊獻龍眼荔枝及生



鮮獻之驛馬晝夜傳送之至有遭虎狼毒害頓仆死亡不絕道徑臨武羗乃上諫曰臣聞上不以滋味為德下不以貢獻為功故天子食太牢為尊不以果木為珍伏見交趾七郡獻生龍眼等鳥驚風發南州土溽惡蟲猛獸不絕於路至於傷犯死亡之害死者不可復生來者猶可救也此二物升獻未必延年益壽帝從之

安帝永初五年二月詔省減郡國貢獻太官口珍

順帝永建四年五月詔曰海內頗有災異朝廷修政太官減膳珍玩不御而桂陽太守文龍不惟竭忠宣暢本朝而遠獻大珠以求幸媚今封以還之

晉武帝咸寧四年十二月太醫司馬程據獻雉頭裘帝

以奇技異服曲禮所禁焚之於殿前勅內外敢有犯者  
罪之

穆帝升平元年扶南天竺旃檀獻馴象詔曰昔先帝以  
殊方異獸或為人患禁之今及其未至可令還本國  
後魏孝文太和二年八月詔罷諸州禽獸之貢

六年三年行幸虎園詔曰虎狼猛暴食肉殘生取捕之  
日每多傷害既無所益損費良多從今勿復捕貢

宣武永平二年十月郢州獻七寶牀詔不納又龍驤將

軍郢州刺史韓務獻七寶床象牙席詔曰晉武帝却雉頭裘朕嘗嘉之今務所獻亦此之流也奇麗之物有乖佩素可付其家人

孝明時城陽王徽為鎮軍將軍時戎馬在郊王師屢變徽以軍旅之費上國封絹二千疋粟一萬石以助軍用帝不納

隋高祖開皇元年三月詔犬馬器玩口味不得獻上十五年六月相州刺史豆盧通貢綾文布焚之於朝堂

唐高祖武德元年十一月詔曰逸遊損德昔賢貽訓玩物喪志前典格言西旅獻葵召公於是作誠東齊饋樂尼父所以離心隋末無道肆極奢靡內騁倡優之樂外崇耳目之娛冠蓋相望徵求不息公私擾遽徭費無窮朕受命君臨志在儉約日旰忘食昧爽求衣纂組珠璣皆云屏絕雕琢綺麗久從抑止其侏儒短節小馬痺牛異獸竒禽皆非實用諸有此獻悉宜停斷宣布遠邇咸使聞知

二年曷娑那可汗獻大珠帝曰珠信為寶朕所寶者赤心耳何用珠為竟不受

六年欽州總管甯長直獻大珠昆州刺史沈遜融州刺史歐陽世普象州刺史秦元賢竝獻筒中布建州刺史葉顥獻練布吳玉杜伏威獻竹帳帝以勞民皆不受之九年九月突厥頡利獻馬三十匹羊萬口帝不受詔頡利所掠中國戶口者令歸之

太宗貞觀五年新羅獻女樂帝不受并五色鸚鵡各令

將還本國

二十年五月高麗王藏及莫離支蓋金遣使來謝罪并獻二美女蓋金即蘇文也帝謂其使曰歸語爾王美色者人之所重爾之所獻信為佳治憫其離父母兄弟于本國留其身而忘其親愛吾若取其色而傷其心我不為也竝還之

高宗永徽二年閏八月吐谷渾河源郡王慕容諾曷鉢遣使獻駿馬帝問其馬之種性對曰臣國中之最者所

以獻之帝曰良馬人之所欲豈可輟彼不足而加我之有餘哉乃命還之

十一月詔曰弋獵畋游素非所好常謂此志布于遠近而蕃夷有獻鷹犬者有阻來遠之情時復為受示以不違其意其諸州及京官仍有訪求狗馬鷹鷂之類來進深非道理自今後更有進者必加罪責

咸亨二年五月周澄國遣使上表云訶迦國有白象首垂四牙身運五足象之所在其土必豐既有威靈又弭

災患力兼十象強制百人以水洗牙飲之愈疾請發兵  
迎取以獻之帝謂使臣曰舜用漆器而人叛紂用玉杯  
而國亡此亦所費不多但是奢麗之漸不可啟也夫作  
法於儉其弊猶奢作法於奢豈能制止故聖人越席以  
昭儉茅茨以戒奢書云珍禽奇獸不育於國方知無益  
之源不可不遏朕安用奇象令其遠獻乃勞其使而遣  
之

儀鳳三年十月詔以來年正月幸東都劔南隴右諸州



每年供進物一二年且停

開耀元年十二月吐火羅進金衣一領帝不受

中宗神龍二年真臘國遣使表請往文單採光明珠玻  
黎玳瑁以獻手制不許

玄宗開元五年以康安國突騎施等貢獻多是珍異謂  
之曰朕所重惟穀所寶惟賢不作無益之費不貴遠方  
之物故錦繡珠玉焚於殿庭車渠瑪瑙總賜蕃國今之  
進獻未識朕懷宜收其情百中留一計價酬答務從優

厚餘竝却還是年突騎施遣使獻橐駝及馬降書謂曰  
卿遠貢忠信請獻駝馬朕玄默為神淡泊為德稅彼部  
落則有勞費已勅有司不令輒受深領厚意宜體至懷  
七年二月癸未勅伊州歲貢年支米一萬石宜停

肅宗至德二年六月戊寅帝降誕日公卿以下咸以進  
獻帝以行在竝不受

乾元元年四月詔曰諸使應進鷹鷂狗獠等一切竝停  
元年建卯月制諸道貢獻除馬畜供軍之外其餘鷹鷂

狗豹奇禽異獸竝不得輒進

代宗廣德二年七月停饒州進乳米

德宗以大歷十四年五月即位閏五月丙子詔曰天下州府及新羅渤海歲貢鷹鷄者皆罷既來者所在放之  
戊寅詔曰山南之枇杷江南之甘橘歲次第貢者取一次以供廟享餘皆罷之

是月癸未詔曰劍南歲貢生歲酒十斛罷之

六月己亥朔詔諸州府祥瑞珍禽異獸鷹犬之類奇器

異服錦繡珠玉等竝不得輒有進獻

已未詔曰揚州每歲以端午之日鑄貢鏡於江中者及幽州歲貢麝香皆罷之

七月辛巳商州歲貢犄膠罷之

十月詔九成宮歲貢立獸爐炭襄州貢蔗弱及種蒔之工皆罷之

建中元年四月癸丑德宗降誕之日也先是元日南至端午及降誕之日四方競貢獻者數千萬及是帝以為

非故事皆不納淄青節度使李正己魏博節度使田悅各獻綾三萬疋悉以歸度支以代租稅妃父王景仙駙馬高怡獻金銅佛像以為帝壽帝謂使曰有為功德吾不欲悉還之

興元元年正月癸酉帝在奉天行在宮受朝賀大赦改元制諸道貢獻自非供宗廟軍國之用一切竝停

順宗以貞元二十一年正月即位二月甲子詔諸州府常貢外不得別進錢物金銀器皿奇綾異錦雕文刻鏤

之類若已發在路者竝納在藏庫

己丑停鹽鐵使月造錢舊鹽鐵錢物悉入正庫以助經費其後主此務者稍以時市珍玩時新物充進獻欲以求恩澤後益甚進錢物謂之羨餘而經入益少及貞元遂月獻焉謂之月進及是而罷

憲宗永貞元年九月襄州節度使于頔進鷹詔却歸之元和元年八月韓全義之子進女樂八人竝入見帝曰吾方節約以訓天下宮中妓樂尚有出之者此獻何為

遂不受

六年四月以張茂昭妓樂女子四十七人歸之

八年九月淄青節度使李師道進鶻十二命還之

十年九月勅澤潞及鳳翔天威軍每進鷄子既傷物性  
又勞人力宜停進

是歲王師討淮蔡諸侯皆貢財助軍太子賓客于頔進  
銀七千兩金五千兩玉帶二詔不納復還

十一年三月詔諸道今年端午進奉宜權停

十月勅兩路兵戈尚未寧息眷言供億每慮勞煩將贍軍需必資省用其今年賀冬來年賀正進奉宜並停

十二年二月勅今年端午進奉宜權停

八月己巳處州刺史苗稷進助軍錢絹及鞋等詔曰天下成敗固有常規刺史進錢固非舊典恐為後例弊及疲民言念于茲義在隱惻其苗稷所進助軍錢絹共二萬六千疋端麻鞋一萬兩宜却還本州苗稷將代貧下戶差稅箭一萬隻令付本道都團練使收管



辛未勅伐叛興師久勞于外饋軍給費固已為煩獻賀之儀屢至諒非朕志務從簡約式表憂勤其今年冬至及來年元日諸司諸道進奉宜停

十三年四月劔南西川奏南詔請貢獻助軍牛羊奴婢等帝發詔褒美不令進獻

十四年六月己酉韓弘進女樂十人命還賜之  
癸丑又進女妓二十人命放歸本道

穆宗以元和十五年正月即位三月罷中州歲貢茶以

數少勞人從觀察使李程之請也

長慶三年正月詔應緣御服及器用在淮南兩浙宣歙等道供進竝端午降誕常例進獻者一切權停并鷹犬之類除備蒐狩餘一切放之

十月停浙東每年進淡菜及海蚶等

四年三月壬子詔天下常貢之外更不得別有進獻縱節度觀察使入朝亦不得進奉諸道監軍自今以後在本道竝入奏竝不得進獻天下所貢竒綾異錦雕文刻

鏤一事以上有涉踰制者悉皆禁斷鷹犬之流本備蒐狩委所司量留多少其餘竝解放仍勒州府更不用進來

七月左金吾衛大將軍李祐進馬一百五十匹詔還之敬宗寶曆元年六月乙酉詔公主郡王自今以後無得進女口

文宗以寶曆二年十一月即位是月鳳翔府淮南進女樂二十四人放還本道

太和元年三月右軍中尉梁守謙表請致仕獻馬五十匹玉帶五十條銀器五擔勅竝不受

四年二月尚書左丞王起進亡兄播銀壺瓶百枚玉及通天犀帶各一條刀劒各一口器械一副馬二匹私白身三人有詔止令受銀瓶刀劒器械及馬其白身却還翊日重進復不受旋命中使就宅宣白身三人更不用進來

七年五月東川浙東奏准詔立春後造新茶

是月吳蜀更以盛冬進貢帝深務仁儉逆物之時凡諸道非時而貢者詔皆禁絕

八年九月詔應進奉口味時果進獻之外不得廣為般次煩于郵傳

開成元年正月詔諸道賀正端午降誕賀冬進奉起今權停三年其錢充折放百姓兩稅所在除藥物口味茶果外不得輒有進獻百司及諸道應宣索製造一物已上並停

二月勅諸道應以禽鳥畋犬等上獻者依舊節例權停  
三年所進監軍嘗進者如例

十二月勅河東每年進蒲萄酒西川進春酒竝宜停

三年六月諸道征鎮各奏准詔停進奉以放貧下戶租  
稅

宣宗初魏謩為戶部侍郎平章事時詹叻國獻象謩以  
其性不安中土請還其使帝從之

大中七年二月興元進犀牛有詔還之

哀帝天祐二年六月以福建每年進橄欖子勅曰禹別九州秦分百郡勉務隨方之職須資利物之源朕所以鄙蒟醬於漢朝慕菁茅於周室用為儆戒以省征徭福建一道遠在海隅常勤土貢每年所進橄欖子頗甚勞役往來本因閩豎生長甌閩自為耽愛率令供進以為定規况非薦熟之珍仍異厥包之禮雖彰忠蓋無濟闕如每年但供進臘面茶外不要進奉橄欖子永為常例後唐莊宗同光元年十一月勅朕大平國患顯紹帝圖

廓天地之妖氛救生靈之塗炭方懷至理永保鴻休敦去華務實之規成革故從新之化足可塞僥倖之路絕繁費之源協我無私告爾有位應隨處官吏務局員寮諸軍將校等如聞前例各有進獻直貢奏章不唯褻瀆于朝廷實且傍滋於誅斂速宜止絕以肅風化

明宗即位初勅曰八表來王蓋率朝宗之義四方述職咸遵任土之宜苟獻奉之過常固煩費而滋甚將隆景運以俟雍熙但思於碎枕焚裘豈悅于珍禽異寶德宜



從儉法在昂新起今後中外臣寮藩部牧伯時節獻賀  
量事達情不得培斂生靈致令愁嘆鷹犬之類勿有進  
獻

同光改元天成下制曰征賦上供國之常典別因進獻  
懼削生靈應節度防禦等使除四正至端午及降誕四  
節量事達情自於內庫圓融不得輒科百姓其四州刺  
史不要貢奉

長興二年九月辛亥勅曰馳騁畋獵聖人每抑其心奇

獸珍禽明王不畜於國朕猥將寡薄虔奉宗祧覽前代  
之興亡思昔人之取捨所以尋頒明詔遍諭遐方推好  
生惡殺之仁罷鵙鷓鷹鷄之貢一則杜盤遊之漸一則  
遂飛走之情近日諸色人不稟詔條頻獻鷹隼既不能  
守茲近勅則何以示彼後人頗謂踰違須行止絕其五  
方見在鷹隼之類竝宜就山林解放此後諸色人等竝  
不得輒將進獻仰閣門使凡有此色貢奉表章不得引

進

三年二月帝謂侍臣曰自今後行幸處宜令止絕進奉是月河東節度使石敬瑭進玉帶光潤異常帝謂之曰朕不少此物復以賜卿敬瑭拜獻數四方受朔日賜以良馬

是月藥彥稠進回鶻可汗先遣使送金裝胡韃遺秦王為党項所掠至是獲之而獻帝曰此物已經剽掠况曾曉諭凡破賊所獲軍中自收今後却賜彥稠所貴示人以信彥稠又進納党項所劫回鶻玉二團尋却賜之

十月癸酉湖南馬希範荆南高從誨竝進銀及茶所上  
章各稱與強寇比隣長資防捍希宣賜戰馬以助軍容  
帝曰湖南接淮寇請馬為宜荆南在內地何煩設備趙  
延壽奏曰藩臣求馬不宜受直請還其獻量賜馬數十  
匹帝曰然乃賜希範馬五十匹從誨二十匹還其獻  
十一月宣旨在京臣寮不得進奉賀長至馬及物色  
末帝清泰元年七月萊毫陳汾四州刺史丁審琪而下  
各進馬賀中宮受冊詔不納

二年五月詔曰朕聞竒伎淫巧增費損功古先哲王常  
戒其事朕憲章百代臨御萬方以其欲致延洪必絕驕  
奢之漸將期富庶須除蠹耗之源每務實以去華期化  
民而成俗近者諸色進奉寶裝龍鳳雕鏤刺作組織之  
異既經釐革尚敢踰違宜再舉行貴於遵守今後此色  
物諸處不得進奉所繇司不得輒通

晉高祖天福二年四月詔下北京留守石重貴凡有諸  
道禮物不得收留

四年六月陳郡民王武穿地得黃金數餅州牧取而貢之帝曰宿藏之地既非符寶不合入官命付所獲之家九月勅曰朕恭已臨民虛心求理務崇儉約以致和平乃眷臣寮悉懷忠義每觀貢助備見傾輸雖嘉奉上之誠宜示酌中之道其寒食七夕重陽及十月煖帳內外羣后進獻宜停

五年四月詔罷雒陽京兆進苑園瓜菓憫勞人也

六年正月詔曰朕自御寰區每思黎庶貴除聚斂以活

疲羸訪聞遐僻邊境之州或無公廨利用之物每因節序亦備於貢輸輟官吏之俸錢率鄉園之人戶雖云奉上其奈害公今後冬年寒食端午天和節及諸色謝賀所屬州縣處俱不得進奉

周太祖廣順元年正月庚辰御札宣示羣臣曰朕以眇末之身託王公之上深懼弗類撫躬匪遑豈可化未及人而過自奉養道未方古而不知節量與其耗費以勞人曷若儉約而克已昨者所頒赦令已述至懷宮闈服

御之所須悉從減損珍巧織竒之厥貢並使寢停尚有  
未該再宜條舉應天下州縣舊貢滋味食饌之物所宜  
除減其兩浙進細酒海味薑瓜湖南枕子茶乳糖白沙  
糖橄欖子鎮州高公米水梨易定粟子河東白杜梨米  
粉菜豆粉玉屑粹子麵永興玉田紅花秔米新大麥麵  
興平蘓小粟子華州麝香羚羊角熊膽獺肝朱柿熊白  
河中樹紅棗五味子輕錫同州石鏃餅晉絳葡萄黃消  
梨陝府鳳栖梨襄州紫薑新笋橘子安州折粳米糟味



青州水梨河陽諸雜菓子許州御李子鄭州新筍鷺梨  
懷州寒食杏仁申州蓂荷亳州革解汾淮州郡淮白魚  
如聞此等之物雖即出於土產亦有取于民家未免勞  
煩率多糜費至時奔迫以來獻逐歲收斂以為常所奉  
止于朕躬所損被于氓庶加之力役負荷馳驅道途積  
于有司之中甚為無用之物此而不止孰曰知微其常  
貢上件物色今後竝不許進奉諸州府更有舊例所進  
食味其未該者宜奏取進止此外猶有數處時新之物

不敢全罷蓋或奉于太后薦于祖宗苟至悉除恐隳常  
敬告于中外宜副朕心帝嘗于便殿謂樞密使王俊曰  
語云飢者不厭糟糠寒者不厭裋褐是知充飲禦寒取  
足而已存理路者亦不可以貴賤易其操朕少孤微艱  
辛備歷逢時喪亂享帝王之位安敢過自奉養以困黎  
民卿可為予疏錄前代州府所獻滋味時菓之類不便  
于民者一切減省之故有是詔

二月鄭州吳處裕言州貢除新笋鷺梨之外今進櫻桃

勅命不該令取進止勅此後勿獻

二年十月右叅議大夫裴吳右監門大將軍李崇本皆自兩浙使迴見進綾絹犀牙帝以海路艱險使臣復命不欲更令進貢却令賜之

十二月邠州侯章獻銀千兩馬七匹上壽不納又進請開宴絹千疋銀五百兩太祖顧侍臣曰諸侯入朝帝王自備宴以申魚水之樂豈俟貢奉然後致宴其侯章所進請開宴銀絹宜却賜之今後諸侯入朝更有如此進

奉亦當不受

三年正月甲子前安州節度使王令溫進開宴絹五百疋教坊二百疋不納

二月前鄧州節度張彥成獻錢七千萬請開宴不納

四月丁巳鳳翔節度趙暉進奉錢絹請開宴不納

壬申前同州節度使薛懷讓進請開宴錢一百萬不納  
八月戊申邢州節度劉詞獻開宴錢不納

十一月甲辰兩浙回使千牛大將軍賈延勳副使大府

少卿李玘等千牛將軍安崇贊獻犀牙綾絹不納

世宗顯德元年正月通事舍人王演高麗復命進黑水馬新羅刀劍不納

六年三月己酉回鶻到闕進玉及硃砂皆不納所入馬量給價時帝以玉之為用無濟于軍國故因而却之

冊府元龜卷一百六十八

欽定四庫全書

冊府元龜卷一百六十九 宋 王欽若等 撰

帝王部

納貢獻

夫貢之不供國有常典獻或無藝人必告勞是故王者  
取彼樂輸嘉其奉上宰旅歸其時事王府受其底貢大  
則謂之述職小則會其時事是以無有遠邇賦以重輕  
既靡嘆于無時亦曷謂其勿受故禮曰各以所有傳曰

史不絕書故始則列于蓬實終則資于國用其或守土者聚斂為德希寵者悉索其賦雖甚盛德猶或忽諸微于前篇蓋亦有矣斯則明識者可俯而觀也

漢高帝十二年十月帝過沛留置酒十餘日乃去沛中

虛縣皆之邑西獻

獻牛酒也之往也皆往邑西親有所獻故獻中空無人

後漢明帝永平十一年灑湖出黃金廬江太守以獻

灑湖

有金廬州合肥縣

東南灑音子小切

章帝建初七年十月岐山得銅器形似酒樽獻之



魏陳留王成熙元年六月鎮西將軍衛瓘上雍州兵於

成都縣獲璧玉印各一印文似成信字

孫盛以為公孫述自以起成都

號曰成二玉之文殆述所作也

唐高祖武德元年十二月乙亥豐州總管張良遜獻駮耳馬二匹

二年十月涼州刺史安修仁獻百年蘇云餌之可延壽

玄宗天寶元年五月平涼郡獲古鐵鼎獻之

九月益州獻三熟蠶繭紫白淨與春蠶不殊

代宗永泰二年山南西道節度使梁州刺史張獻成獻  
名馬二匹絲絹雜貨共計十萬

大曆二年二月汴宋節度使田神功至自汴州獻馬十  
匹金銀器五十床繒綵一萬疋

六月山南劍南副元帥黃門侍郎平章事杜鴻漸自成  
都府召至鴻漸獻金銀器五十床錦羅十五床麝香臍  
五石

德宗貞元元年十二月戶部奏今年見到貢物總一百

五十六州府

十一年齊暎為江西都團練觀察使暎嘗自以為相無大過當復入用乃多進獻及為金銀器以希旨先是禁中銀餅大者高五尺餘及李蕙為江西觀察使又獻高六尺者至是年帝降誕日及端午暎獻高八尺餘者

十二年宣歙團練使劉贊卒贊初委遇副使嚴綬政事多所咨訪贊卒綬掌留務竭府藏以進獻繇是有恩入拜尚書刑部員外郎天下賓佐貢獻專達自綬始也未

幾河東節度使李悅嬰疾事曠弛行軍司馬鄭儋代總  
軍政選綬代儋為司馬遷檢校司封郎中是時姑息四  
方諸侯未嘗移代物故即以其軍司馬為帥德宗嘗嘉  
綬之前日進獻記其姓名故驟蒙選任未一歲儋卒拜

綬銀青光祿大夫檢校工部尚書兼太原尹御史大夫

北都留守充河東節度度支營田觀察處置等使

興元初克

復京師後府藏空虛諸道之有進奉以資經費復時有  
宣索其後諸賊既平朝廷無事常賦之外進奉不息韋  
臯劍南有日進李兼江西有月進注亞揚州劉贊宣州  
王緯李錡浙西皆競為進奉以固恩澤貢入之奉皆曰

臣於正稅外方圓亦曰羨餘節度觀察使或託言密旨乘此盜貿官物諸道謫罰官吏刻削祿廩入其財通津遠道者稅之蒔蔬藝果者稅之死亡者稅之節度觀察交代或先期稅入以為進奉然十獻其二三耳其餘沒入者不可勝紀也其後裴肅為常州刺史乃鬻薪炭債案牘口價之上皆規利焉歲餘進奉無幾遷浙東觀察使天下刺史進奉自裴肅始劉贊卒於宣州嚴綬為判官領軍府資用進奉無幾徵拜刑部員外郎天下判官進奉自嚴綬始天下貢賦根本既出江淮時江淮人甚困而聚歛不息

十七年衢州刺史鄭式瞻進絹五千疋銀二千兩帝曰式瞻坐事已詔御史按問進物宜付左藏庫

憲宗元和四年四月命中使劉承謙宣副度支近有勅

文不盡進奉其山南東道節度使裴筠所進銀器六十事共一千五百六兩宜准數收管送納左藏庫

八年八月汴州節度使韓弘進絹五百疋

九月淮西節度使吳少陽獻征馬三百疋

十三年四月荆南節度使王諤之子稷進永寧里宅及宣義里亭子時議以諤起兵間因緣際會累居大鎮厚殖財貨營第宅頗逾侈又請京兆府籍坊以廣亭榭朝廷業以優待姑容其專既沒而入於官司固其所也

十四年五月涇原節度使王潛進銀三千兩熟絹綾五

千疋

涇州密邇戎境其上無百姓其軍皆仰給度支舊矣至若無名上獻雖吳蜀沃富猶取諸人以干媚

不免于譏責今則盜削軍食以充貢獻而求恩澤蓋以時急於財勢使然也

七月宣武軍節度使韓弘進絹二十五萬疋絁三萬疋

銀器二百七十事左右軍中尉各進錢一萬貫馬二匹

自淮右宿兵以來度支鹽鐵及四方進獻不已始曰助軍寇平則曰賀禮其后又曰助賞設及帝加尊號又陳獻賀之禮

九月考功郎蕭祐詣右銀臺進古今書畫二十卷

穆宗以元和十五年正月即位八月澤潞節度使辛祕  
進豸七頭五坊使進豸八頭非常獻也

十二月江西觀察使王仲舒進臘日箭三千隻非常劍  
也

長慶元年三月范陽節度使劉總進馬一萬五千匹

二年九月鄜坊節度使崔從上言當管軍士因廝薪得  
古銅器十四面有篆文隨表獻之

十二月韓弘孫紹宗進亡祖白身口五人馬十匹橐駝



十頭絹五千疋銀二千錠及器物刀劍弓箭等

三年二月西川段文昌進繒羅等四千八百疋

敬宗以長慶四年正月即位二月庚子西川節度使杜元穎進罽畫打毬衣五百事

八月淮南節度使王播進宣索銀粧奩二

十月淮南淮西又各進宣索銀粧奩三

寶曆元年六月以檢校右僕射兼戶部尚書薛華為檢校司空兼河中尹御史大夫充河中節度觀察使華理

青齊有政績時論方洽及是進絹萬疋旋有此拜議者甚惜

十月荆南節度使王潛於賀冬進獻常數外別進絹一萬七千疋

是月昭義監軍使進豹三頭

十二月荆南節度使王潛又進賀正常進外別貢綾絹一萬疋

二年七月鹽鐵使王播進羨餘絹五十萬疋

十月幽州節度使李載義進馬腦鞍一具

十一月昭義節度使劉從諫進狴三頭

文宗太和元年三月太原節度使李種進宣索馬鞍一  
百具奉先朝之命也四方諸色貢獻類是者衆不復舉  
三年十月故鄆州烏重胤男從弘奏請進助南郊絹一  
萬疋生馬一百匹請降中使交領

五年正月詔天下方鎮端午進奉雜綵匹緞等從今後  
竝令進生白綾絹

八年十一月太原節度使李載義進楊志誠馬千匹

懿宗咸通七年七月沙州節度使張義朝進甘峻山青  
駝鷹四聯延慶節馬二匹吐蕃女子二人僧曇延進大  
乘百法明門論

僖宗光啟元年閏三月鎮州王鎔進耕牛一千頭戎器  
九千三百事

昭宗乾寧元年正月鳳翔李茂貞來朝獻妓女三十人  
天祐元年十二月廣州劉隱進佛捨國訶陵國羅越國

所貢香藥

後唐莊宗同光元年十一月偽永平軍節度使張筠遣  
其弟錢即蘭切進馬三十匹銀二千兩御衣千段

是月宿州朱保謹進本朝十二列聖寫真及玄宗封泰  
山圖

二年正月鳳翔節度使李茂貞進龍鳳玉帶

是月涇原節度使李暉進寶裝針珥錦綵於皇后宮及  
河南尹張全義諸藩鎮進暖殿物貢羊馬等

二月福建節度使王審知遣使奉貢

三月淮南楊溥遣其右威衛上將軍許確進賀郊天銀  
二千兩錦綺羅一千二百疋細茶五百斤象牙四株犀  
角十株

五月故秦王李茂貞遣使王修進遺留禮物水晶鞍盤  
龍玉帶馬瑙酒盃翡翠爵琉璃瓶玳瑁唾盃銀蓮花座  
珊瑚樹一株軍器繒絲錦等

九月兩浙錢鏐遣使錢詢貢方物銀器越綾吳綾越絹

龍鳳衣絲鞋屐子進萬壽節金器盤龍鳳錦織成紅羅  
縠袍襖衫段五色長連衣段綾絹金稜祕色瓷器銀裝  
花櫥木厨子金排方盤龍帶御衣白龍璫紅地龍鳳錦  
被紅藤龍鳳箱等

十月湖南進羅浮柑子福建節度使王審知進萬壽節  
并賀皇太后到京金銀象牙犀珠香藥金裝寶帶錦文  
織成菩薩幡等

是月湖南馬殷進萬壽節銀龍鳳陷花漆浴斛一盤龍

御衣龍鳳蹙金鞞腰龍鳳裝箭箠龍鳳朱背弓紅絲弦  
金鍍頭箭銀千兩又安義孔勅進寶裝酒器

十二月淮南吳國王楊溥遣使王權進賀正金花銀器  
錦絲千段御衣金器洎太后禮物

三年二月桂州馬賓貢方物

是月車駕在鄴庚午皇后劉氏生辰王都樞密使各進  
上壽物錦綵金銀器又河中李繼麟進縑銀為宴資又  
湖南馬殷進羅浮柑子



五月吳越王錢鏐獻孔雀二又淮南吳越國主遣使王  
浩獻重午物銀錦紗縠細茶篔扇龍鳳紗紋厨諸州府  
各貢端午物

九月徐州進九鍊神鋼刀劍各一

十月兩淮錢鏐留後錢元瓘蘇州節度錢元璪各貢進  
金銀錦綺數千件御服犀帶九經書史漢唐書共四百  
二十三卷

四年正月鎮州知州梁文矩奏准宣進花果樹栽及樂

官梅審鐸等并已赴闕

是月兩浙錢鏐貢佛頭螺子青一山螺子青十婆薩石  
蟹子四空青四其表不題又沙州節度使曹義全進謝  
賜旌節官誥玉鞍馬二玉團硎砂散玉鞍轡鉸具安西  
白氎胡錦雄黃波斯國紅地松樹牂楊胡桐淚金星舉  
大鵬沙

二月沙州曹義全進和市馬百匹羚羊角硎砂鬘牛尾  
又進皇后白玉符金青符白玉獅子指環金剛杵

瓜州刺史慕容歸盈貢馬

明宗天成元年五月西都知府張錢進魏王繼岌打毬馬七十二匹

九月壬申河中進百司紙三萬張詔紙二萬張舊制也十一月戊辰戶部侍郎王權奏每年正仗天下貢物陳于殿庭屬戶部司引進切以近年以來未甚齊整本二百餘州貢物今止六十餘州伏以任土勤王本朝故事異申尊獎所謂駿奔伏乞遍下諸州請依貢式陳進正

仗之日所貴整齊從之

是月淮南偽吳主楊溥遣使魯思郾來賀帝登極持銀千兩金百兩綾一千二百疋茶三百觔受之

二年四月吳主楊溥差右威衛將軍雷峴進銀千兩綾羅錦綺千疋修重午之禮

九月潞王從珂鎮河中進青氊帳一頂制度極廣并隨帳諸物竝金銀裝雕鏤龍鳳甚有奇功帝嘉賞之

十月帝將幸汴州潞王從珂自河中聞大駕巡幸進銀

裝道遙子一頂

十一月福建節度使王延鈞進犀牙香藥海味等

三年五月西川進助大禮錢五十萬白熟布十萬疋

十月前北京皇城使李繼中弟姪三人進馬二百五匹

金器八百兩銀萬兩家機錦百疋白羅三百疋綾三千

疋絹三千疋繼中者故昭義帥嗣昭之子少有心疾其

母楊夫人自潞州積聚百萬輦于荊州私第繼韜之叛

沒之于官莊宗南郊助太平賞給繼韜伏法其母又輦

及晉者餘百兩至楊氏卒其弟湘州刺史繼能潞府司馬繼襲聞哀俱至繼中等詣官告變繼能繼襲伏法弟姪等遂得分其所聚故有是獻

十一月安重誨以生辰諸處人事得馬五十匹進克內廐

四年正月青州于登州崖得風飄到新羅船進其寶貨五月甲午東川進助南郊錢十萬貫

八月乙丑兩浙錢鏐使袁韜進銀五千兩茶二萬七千

斤謝恩加其諸子官

十月戊戌福建王延鈞進謝恩銀器六千五百兩金器  
一百兩錦綺羅共三千疋并犀牙玳瑁真珠龍腦笏扇  
白氎紅氎香藥等又進謝恩進封母為魯國太夫人銀  
四千五百兩茶蕉海蛤通楨箭等

長興元年五月靈武進野駝峰二枚

十月福建王延鈞進賀郊禮畢銀七千兩及蕉牙香藥  
金器百兩

三年三月西京奏百姓侯可洪于楊廣城內掘得玉四團差三橋鎮使朱廷義呈進賜廷義絹二十疋可洪等絹二百疋別賜價錢二百貫

四年十月己巳夏州李曇超進馬五十匹

是月前秦州節度使劉仲殷受代歸京獻馬七十匹

廢帝清泰元年五月壬戌平盧軍節度使房知溫來朝及與諸將歸鎮宴于長春殿始奏樂知溫獻奉數萬計七月辛丑前邠州節度使康福入朝獻金龍鞍勒馬十



一匹

九月辛酉兩浙錢元瓘獻銀五千兩綾絹五千疋又元瓘弟蘇州中吳軍節度使元球及諸弟領安南桂廣節度使元球等四人共貢銀七千兩綾絹七千疋

十月丙戌皇子河南尹重美洋王從璋涇王從敏宣徽使李專美獻煖帳羊酒爐餅火具襄州趙在禮獻青氊帳紅錦織成龍鳳煖帳

甲寅河南尹重美又獻冬服綿綺綾羅三百疋

十二月戊戌靈武張希崇獻拒霜壘三器馬十八匹控  
鶴都指揮使李重謙獻馬十匹時征馬少親將首率也  
二年九月甲寅兩浙貢茶香綾絹三萬六千計

是月杭州錢元瓘進銀綾絹各五千兩疋錦綺五百連  
金花食器二千兩金稜祕色磁器二百事

是年靜海軍節度使錢元珣中吳軍錢元球各貢銀綾  
羅器物等

十月己巳鎮州董溫琪獻御服羅錦絹三百疋銀一千

兩非禮也言貢奉可也

十一月乙未前靈武節度使張希崇入朝獻馬五十匹  
玉團隴右地圖斜褐犛牛尾野馬皮拒霜菜

晉高祖天福二年二月丙戌故晉州節度使張敬達母  
朱氏進銀器駝馬謝恩賜還舊業

丁酉故青州節度使房知溫子彥儒進絹一萬疋

四月戊子房彥儒又進絹五千疋

己酉秦州康福進戰馬十匹供御馬一匹玉鞍轡一副

是年幽州趙思溫進端午鞍馬器四纒帛等物

是年襄州安從進進謝恩加官絹一千疋金一千兩銀一千兩犀三株牙一株

九月鎮州安重榮進馬三十匹

十月宋州趙在禮進織成龍鳳紅錦煖帳一副

是月吳越王錢元瓘進銀五千兩絹四十疋吳越異紋綾一千疋羅二百疋又進金帶御衣雜寶茶具金銀裝劍并細紅甲寶裝弓箭弩等又進雜細香藥一千斤牙

五株真珠二十斤茶五萬斤

十一月甲寅前涇州李德克進戰馬三十四匹犛牛四頭  
丁巳襄州安從進進絹一千疋馬二十四匹

十二月丙申宋州趙在禮進助國絹三千疋

辛丑湖南馬希範進銀二千兩賀日南至

乙丑又進金漆栢木銀裝起突龍鳳茶床椅子踏床子  
紅羅金銀錦繡褥紅絲網子又進金銀玳瑁白檀香器  
四及銀結條假果花樹龍鳳蠻畫鼓等物又進含膏桃

源洞白茅百靈藤渠江南嶽紫蓋峰白雲洞清花等茶  
又進蟬翼鍾乳乳頭香石亭脂木瓜丸一萬顆帝覽之  
謂侍臣曰竒巧蕩心斯何用耳藥茗可進而丸可食乎  
但地僻海曲習以成風來遠之道遽止為難宜令所司  
與收

三年正月壬戌昭義軍杜重威進助國馬二十匹銀五  
百兩玉帶五條

五月己巳招討使楊光遠進謝恩加官馬十匹絹一千

足銀器一千兩

六月丁丑鄆州安審琦進謝恩加官馬十匹銀五百兩  
絲一千兩絹五百疋

丁亥河中安審信進謝恩加官馬三十匹

壬寅荆南節度使高從誨進謝恩加官馬二十匹銀二  
千兩

甲辰陝府李從敏進謝恩加官馬十匹錢一萬貫

是月北京留守安彥威進加官馬一十匹錢三千貫

七月庚戌西京留守李周進謝恩加官馬一十四匹銀二千兩鎮州安重榮進謝恩加官馬十匹絹二千疋

八月丁丑秦州節度使康福進謝恩加官銀五百兩馬三十匹

乙未鳳翔李從暉進謝恩冊授秦王馬五十匹

九月乙丑鄆州安審琦進添都馬五十匹徐州裴從簡直進馬三十匹

又亳州團練使郎萬全直進馬二十五匹



丁丑滄州馬全節進御衣織成紅錦床褥雜色綾一千  
疋綿五千兩

十月乙亥福建節度使王繼恭進奉天和節竝賀冬端  
午銀共五十兩

是月王繼恭又進金器六事二百兩金花細縷銀器三  
千兩真珠二十斤犀三十株銀裝交床五十副牙二十  
株又進大茶八十斤香藥一萬斤朱竒銀纏槍二百條  
通節箭竒三萬莖又進五色桐皮扇子海蛤麋靴細蕉

藥木瓜等物

丁丑范延光差男守節守嚴等進謝恩累差使臣安撫馬三十匹銀一千兩絹三十二疋

乙酉青州王建立進謝恩賜冊禮銀器一千兩繒帛二十疋

丙戌兩浙錢元瓘進謝恩除天下兵馬副元帥吳越國王金器五百兩銀一萬兩吳越異紋綾八千疋金條紗三千疋絹二萬疋綿九萬兩大茶腦源茶共六萬四千

斤又進大排方通犀瑞象腰帶

戊子前鄆州安審琦進絹三千疋絲萬兩兩浙錢元瓘  
又進真珠二十斤牙三十株乾姜五萬斤蘇木五萬斤  
雜香五十斤

辛卯宋州趙在禮進助國錢二萬貫

丙申魏府楊光遠進謝恩允臣朝覲馬三匹絹一千疋  
玉腰帶金酒器等又進謝恩賜旌節官誥馬五匹絹一  
千疋銀器三百兩新授晉昌安審琦進謝恩賜旌節官

誥馬二匹絹一千疋又進請開內宴金腰帶一條絲一萬兩樂官絹二百疋

壬寅徐州裴從簡進錢一千貫絹一千疋

是月鎮州安重榮進錢一萬貫

十一月乙巳鄆州范延光來朝進馬三千匹絹二千疋銀二千兩

丙午又進請開內宴絹一千疋伶官絹二百疋定州皇甫遇進絹三千疋

丁未范延光又進絲十萬兩耀州團練使安元信進添都馬二十五匹

甲寅新授西京留守楊光遠進謝恩馬三十匹銀器三百兩絹一千疋

丁巳鄴都副留守太子太師致仕范延光進謝恩馬十匹絹一千疋玉腰帶一條金匣盛金酒器一副

壬申前西京留守高行周進絹一千疋馬十匹

十二月己卯新授鄴都留守高行周進謝恩馬十匹絹

一千疋銀器三百兩內宴錢一萬貫

乙酉湖南馬希範進御輦一乘金漆栢木鏤金花板銀裝真珠車渠紅絲網囊又進謝恩除江南諸道都統絹二千疋又進謝改功臣加食邑銀鈔羅四十面重二千兩又進土絹土絕吉貝布共三千疋謝恩放免逐年三十五萬茶稅又進楚金五十兩

五年二月戊申湖南進卧輦一乘御衣一襲與鳳文之靴龍玉之帶

六年八月甲寅湖南遣使進金銀器及方物

十月己丑吳越王錢元瓘進金帶一條金器二百兩銀  
八千兩綾三千疋絹二萬疋金條紗五百疋綿五萬兩  
茶三萬斤謝恩加守尚書令

辛卯又進象牙諸色香藥軍器金裝茶床金銀稜鏡器  
細茶法酒事件萬餘

甲午湖南貢諸色香藥蠟面含膏茶

壬子福州王延義遣使進銀四千兩象牙二十株葛五

十疋乾薑蕉乳香沉香玳瑁諸物謝恩加官別進端午  
節銀一千兩細葛二十疋海蛤靴裁扇子等物又進茶  
五千斤福建兩浙隔閩淮南陸道不通歲以海船來往  
風濤無常故凡節度申貢或先時或不及時也

癸丑福建進度支戶部商稅葛八千八百八十疋

十一月戊午殿中監劉政思進竹牛角五對

壬申荆南遣使進金器一百兩御衣段羅綾絹一百五  
十疋白龍腦香二斤九鍊純鋼金花手劍二口謝恩賜



御馬別進賀冬至銀五百兩

己卯殿中省進麝香熊膽熊蹯從舊制也

丁酉湖南遣使獻吉貝等三千疋白蠟一萬斤朱砂五百斤并諸香藥五千餘斤別進漆萬餘事

七年三月戊寅涇州節度使張彥澤到闕進朝見謝恩馬九匹又進馬五十匹并銀鞍轡黑漆銀錢子馬面人鐵甲弓箭袋渾銀裝劍共五十副又進駱駝二十頭己卯又進馬五十匹供御金鍍銀鞍轡一副

庚辰又進馬五十匹金鞍轡全人馬甲弓箭各五十副  
彥澤在前任擅討吐蕃部族為其所敗遂括境內馬千  
餘匹以補其數至是頻有是獻

四月己巳新授龍武軍大將軍張彥澤進謝恩馬十匹  
五月甲申朔荆南遣使進賀端午白金茜緋篋扇等物  
少帝以天福七年七月即位十一月兩浙錢弘佐遣使  
進錠銀五千兩絹五千疋絲一萬兩謝恩封吳越國王  
又貢細甲弓箭箭扇子等又貢蘇木二萬斤乾薑三萬

斤茶二萬五千斤及祕色甕器鞋履細酒糟薑細紙等  
回鶻托都督已下進礪砂千八百斤犛牛尾一千斤白  
布一萬疋斜褐一百段玉梳玉裝刀子等物

十二月福建王延義遣使進錠銀二千兩花鼓六面謝  
降恩命又進象牙十株紅蕉二百疋蟬紗二百疋餅香  
沉香煎香共六百斤胡椒六百斤肉豆蔻三百斤箭幹  
二萬隻謝賜國信又進錠銀四千兩貢蕉二十疋海蛤  
十斤扇子靴裁具等克端午天和節正冬獻賀又直進

錠銀一千兩葛一萬足細蕉二百足粉薑五千斤象牙  
十株蠟面茶二百斤大茶五千斤又進鹽鐵度支戶部  
三司葛一萬六千六百足及諸口味等

八年十月鎮州節度使杜重威直進馬五十匹

十一月密州刺史張瓘奏膠西縣孝行鄉諸城村百姓  
于希得蛇吐珠一顆進之時無慰答亦無錫賚議者非  
之

開運二年十月湖南進供御細絹六千足衣着白羅一

百疋筒卷白羅十疋錦綺褥面十牀錦綺背十合淮南  
進羅縠一百疋謝恩賜御馬

三年九月前青州防禦使翟光業進絹一千疋綿三千  
兩絲七千兩

十月河府侯益進馬五十匹

是月陝府焦繼勳進馬四十匹絹一千疋

是月華州安審信進馬四十匹太子太師致仕劉景巖  
進馬三十匹鳳翔李從儼進馬四十匹

十月兩浙錢弘佐進謝恩授守太尉冊命銀五千兩綾  
五千疋絹一萬疋又茶一萬八百斤腦源茶三萬四千  
斤又進乳香黃散香共一千斤又進乾薑三萬斤蘇木  
三萬斤箭筈一萬莖諸色戎仗等物又進啟聖節金大  
排方座龍腰帶一條御衣一襲十六事金花銀器一千  
五百兩御服錦綺綾羅五百疋

漢高祖天福十二年荆南高從誨賀登極進金花銀器  
一千兩異紋綺錦法錦三百疋筒卷白羅二百疋白花

羅一百疋絨毛暖座兩枚九鍊純鋼手刀一口

乾祐元年六月壬寅高從誨貢金器二百兩銀器千兩  
細綿五十疋繡錦六銖五十段羅二百疋龍腦二斤以  
首過自新故書

十月丁酉湖南馬希廣貢除夜遊春圖女俠畫障真珠  
枕及端午金銀彫裝物色帝年未及冠服玩好奢嘗為  
七寶枕玉枕玉缸餅盤之類而湖湘貢侈物益蕩其心  
十一月兩浙貢茶三萬四千斤及香藥兵仗湖南貢茶

五萬斤

十二月癸未史弘肇獻錢萬緡馬二十匹以助軍討叛  
又朗州節度馬希萼獻銀器千五百兩降詔獎飾仍諭  
之云所修職貢舊有規程念航深梯險之勞重違卿意  
在誘善勸忠之道本實朕心今後凡有進獻可與希廣  
商量庶叶雍和不爽體制

隱帝乾祐二年九月壬寅湖南馬希廣獻絹二萬疋銀一萬  
五千兩玳瑁寶裝龍鳳板牀盤龍椅子蹋牀子銀戲龍二銀



食器六十八事真珠花銀果子其銀共千兩

是年宰相侍衛使三司使以犬戎犯河朔獻馬自三匹至二十匹

周太祖廣順元年正月荆南高保融貢銀一千兩法錦二十疋賀登極

癸巳寒食節帝出玄化門設御幄遙拜諸陵開封府表義獻熟羊酒食

丁巳宰臣馮道已下獻馬賀皇太子授鎮寧軍節度使

己未昭義常思貢錢三十萬賀太子鎮澶州又直進錢  
二千五百貫布二千五百疋粟七千石故史弘肇弟弘  
福貢馬五匹綿絲五百疋謝禮葬兄弘肇漢末弘肇楊  
邠王章遇害帝葬以王禮喪事並官給

四月宰臣樞密宣徽使各獻馬賀冊德妃荆南高保融  
貢銀二千兩謝加恩別進請開宴絹一千疋金酒器重  
五十兩素羅花羅花縠子各百疋長金線絨毛暖十二  
壬子兗州慕容彥超獻龍鳳鞍轡御馬縑帛賀冊德妃

高保融又貢端午銀絹青子扇等

五月甲子鎮州武行德來朝獻粟二萬石

七月邠州侯章進馬三十匹

甲申慕容彥超上章謝賜西京興教坊第一區長男衙  
內指揮使繼勳遙領明州刺史次男繼雲轉官進絹千  
疋絲三千兩別進永壽節祝壽絹二千疋

十二月荆南獻銀五百兩慕容彥超獻馬二匹皆賀正  
也

二年三月鄆州高行周進助軍絹五千疋并戎裝器仗  
五百事

四月丁未潞州襄垣縣民張紹先等八人詣闕獻羊酒  
以除放去年殘稅謝恩也

五月車駕親征兗州次曹州鄭孔璋獻銀射盃百雙衣  
著三百疋鄆澶宋許四鎮各獻茶藥

是月甲子旦次成武鄆州高行周自鎮來朝貢絹三十  
疋及器械單州許進來朝獻食丙寅次張康鎮徐州王

晏來朝進馬七匹戊寅青州節度使符彥卿來朝獻馬  
十三匹己卯又進錦綵三千疋軍糧萬石

六月丁亥迴次鄆州高行周進錢絹請開宴又進車駕  
巡幸絹五千疋錢五百萬戊子宴于行宮行周以金酒  
器鞍馬為壽辛卯次澶濮滑州扈彥珂來朝王殷獻馬  
十匹三千金酒器

八月昭義節度使常思來朝獻絹三千疋銀千兩粟二  
萬斛草三萬圍

九月戊午故高行周男前鄆州衙內指揮使高懷德進馬五十五匹

壬戌靈武節度使留後馮繼業獻馬百匹謝弔祭定州進所獲契丹馬六千一百匹

十一月甲寅兩浙錢弘俶遣判官貢奉御衣犀帶金銀裝兵仗金銀器綾絹茶香藥物祕色甕器鞍屐海味酒等涼州申師厚進馬一百一十六匹詔還其直閑廐使史孔福獻馬謝却賜涇州物產

十二月鄭州防禦使王進以迎侍母親到郡獻馬謝恩  
進母先往易州離兵革失其所在近於北蕃訪獲而歸  
之故喜而稱謝

戊子邠州侯章罷鎮至闕獻馬百匹絹五千疋

三年正月樞密使王峻獻戰馬二十匹宰臣獻三司李  
穀所傷臂漸損難任拜起進朝見馬親除天平軍節度  
使符彥卿進謝近鎮馬十匹帛二十疋及軍器等

丁卯朗州獻茶二萬斤宰臣樞密宣徽內諸司使禁軍

將校諸藩鎮皆進奉賀皇子嘉禮

二月延州衙內指揮使高紹基獻馬四十二匹紹基父死擅知軍政潛有覬望及軍屯近鎮故懼而獻奉

三月又獻馬五十匹駝三十頭銀千兩金器百兩

三月高懷德進絹三十疋銀三千兩金酒器六副馬十五匹勅賜亡父行周謚及立碑

四月丙寅宋州節度使常思入朝獻縑銀匹兩各二千五百大絁綾五百疋又鳳翔趙暉來朝進馬一百一十



七匹絹五千疋銀五千兩賜襲金帶又西涼府節度使  
牛師厚遣都知兵馬使拓跋貞美等四十九人朝貢駝  
馬又鳳翔趙暉進牽攏官衙隊一百九十五又進絹三  
千疋金三百兩

五月甲申宴于廣政殿宋州常思獻上壽金酒器同州  
薛懷讓獻銀五百兩馬五匹

十一月乙巳襄州安審琦獻銀萬兩助郊祭

乙亥兩浙錢弘俶貢謝恩綾絹二萬八千疋銀器六千

兩綿五萬兩茶三萬五千斤御衣兩襲通犀帶戲龍金帶香藥斃器銀裝甲仗法酒海味等

戊寅涇州節度使史懿朝見獻馳馬二百銀千兩

癸卯鄭州防禦使王萬敢獻助郊祭絹二千疋

六年六月大名府王殷貢絹萬疋棣州何祿進獻供用羅綺二千五百疋荆南高保融進白龍腦法錦金酒器紅六銖段五十白羅花羅熟縠鹿胎袴段六銖襜面等各一百九鍊神鋼陷金銀刀劍各一

十二月辛亥諸州府進南郊助祭鞍馬絲帛金銀等

世宗顯德三年二月丁亥荆南節度使高保融進御衣  
金帶九鍊純鋼手刀弓箭等

十一月丙辰吳越王錢俶進銀五千兩綾一萬疋又進  
天清節金花銀器千五百兩又御服金帶錦綺綾羅等  
五年二月幸揚州壬申吳越王錢俶進御衣犀帶綾絹  
白金香藥等又進供軍稻米二十萬石

四月吳越王錢俶進綾絹各二萬疋銀一萬兩稱謝恩


賜國信

閏七月癸丑吳越王錢俶遣使朝貢進銀五千兩絹二萬疋銀器三千兩細衣段二千連又御衣盤龍犀帶等八月吳越王錢俶進銀五千兩絹萬疋稱賀車駕還京又進龍舩一隻天祿舩一隻皆以白金飾之帝幸新河亭命宰臣及從官已下觀吳越所進龍舟時京師庶士觀者如堵

十一月吳越王錢俶進茶三萬四千八百斤綿五萬兩

及香藥器甲等

十二月吳越王錢俶進銀五千兩絹三萬疋綿十萬兩  
稱謝恩賜國信又進賀正錢一千貫絹一千疋



冊府元龜卷一百六十九